

四庫全書

史部

欽定四庫全書

幸魯盛典卷十四

五月二十六日癸卯

命廣儲司員外郎阜保恭賚

御書

聖廟碑文設

御仗黃蓋鼓吹率鴻臚寺序班朱圭赴闕里鐫刻六月

初六日壬子衍聖公孔毓圻率纂修諸臣五經

博士孔毓埏及屬員師生人等兗州府知府祖
允圖率該屬有司奉迎於汶上縣二十二日戊
辰

御書至於闕里於是山東巡撫錢珏布政使黃元驥濟
東道陳俞侯提學道宮夢仁督糧道胡介祉兗
東道李煒監運使鮑復昌濟寧道董安國及各
屬文武官員咸赴闕里瞻仰

御筆員外郎阜保令朱圭等即摹

御書勒石

山東巡撫錢珏

題為恭報微

臣

出省日期等事

臣

惟前者

聖駕東巡

親詣闕里尊崇

至聖茲接邸抄奉

旨差廣儲司員外郎阜保賁捧

御製碑文馳到曲阜

臣

隨於康熙二十六年六月初二

日單騎減從前往曲阜瞻仰

龍翰至泉林周孟二廟造碑今臣亦親往督令如式置

造理合題報奉

旨該部知道

七月二十四日庚子

御碑告成廣儲司員外郎卓保恭賫摹搨樣本進呈

御覽二十八日甲辰工部筆帖式昂機圖運送綠琉璃

瓦一萬五千至於廟庭

衍聖公臣孔毓圻

奏為恭謝

天恩事切蒙

皇上欽賜

聖廟碑石本年二月內工部等衙門會議得大成門
外左廂金聲門之右高明爽塏可以建立碑亭
動支

內帑五百兩差內務府廣儲司員外郎卓保工部都

水司員外郎卞永式督修等因奉

旨依議欽此欽遵隨於二月二十八日礮石蓋亭一體
興工復蒙

皇上命內務府廣儲司員外郎阜保帶領鴻臚寺序班
朱圭前來勒石於五月二十五日豎碑於七月
初十日鐫完訖復蒙

皇上賜到綠琉璃瓦一萬五千於九月二十八日碑亭
俱已完工仰惟

皇上

聖明天縱

學問性成觀風廣魯既肇稱

親祀之儀

眷注尼山復重以

穹碑之錫鑿翠琰於恒嶽秀韞崑岡騰寶氣於端門

瑞符黃玉爰賁

龍章直探星宿竝揮

鳳藻上轅瓊霄

至言浩瀚弘道德之五千

妙楷端嚴本義疇之一畫發明綱常彝教若布帛菽粟
之竝陳昭示會極臣民化偏黨競練而遵路千
年祠宇昭

聖撰而重光歷代文章待

宸篇而立極睠茲碑制之隆已逾前古邇者碑亭之建

復費

天心屢頒

內府金錢制其經費仍

勅皇華修建董以成功

特遣名手以臨摹法傳鐘鼎載

命尚方而燒造瓦致瑠璣跪誦

御書之搨適逢傑構之成重檐複栱輝於大成之門碧

甃丹雘坐鎮奎文之後遐邇咸觀曩今共仰考

明堂辟雍之制樹弘規於興聖之區即鼓鐘彝

鼎之間敷

寶訓於觀摩之地一夫不役自仰體於

聖衷兩載經營顧猶煩乎

天使軼前王之制作炳煥千秋冠廟寢以巍哉垂休百
代謹以報成恭陳

奏

謝奉

旨覽卿奏謝知道了該部知道

附錄 唐高宗乾封元年贈孔子為太師是年
封岱車駕幸闕里駐蹕謁先聖祠廟皇太子弘
上表乞樹碑以彰聖德曰臣聞周師東邁商閭
延降軾之榮漢蹕西旋彝門致抱關之想況泣
麟曾躅歌鳳遙芬被緝禮於昌辰飾殊榮於穹
壤者伏惟陛下資靈統極稟粹登樞乃聖乃神
體陰陽而不宰無為無事均雨露之莫私六符
薦而泰階平百寶臻而天祚永靈臺所以偃伯

延閣由其增絢尚齒尊賢邁鴻名於萬古興亡
繼絕騰峻軌於千齡大矣哉茂實英聲固無得
而稱矣日者封金岱畎會玉梁陰路指沂川途
經闕里回鑾駐蹕式鑑堯禹之姿闢續凝旒載
想溫良之德於是特紆宸渙贈以太師爰命重
臣申其奠醑廟堂卑陋重遣修營褒聖侯德倫
子孫咸蠲賦役臣恩均庖從迹濫撫軍舊烈遺
塵躬陪瞻眺雩壇相圃欣覲前聞又昔歲承恩

齒胄膠塾歷觀軒屏具列門徒想仁孝於顏曾
彌深景慕採風猷於竹帛冀啓顓蒙所以輕敢
陳聞庶加褒贈天慈下濟無隔異時咸登師保
式光泉夜敢以前恩重茲干請竊謂宣尼之廟
重闡規摹桂殿蘭羞永傳終古崇班峻禮式賁
幽埏而翠琰莫題言猷靡暢詢諸故實有所未
周且將聖自天惟幾應物拯人倫於已墜甄禮
樂於既傾祖述勲華三千勵其瞻仰憲章文武

億兆遵其藏用豈可使汾川遺碣獨擅於無慚
峴岫餘文孤標於墮淚伏見前件孔廟營構畢
功峻業增歲事資刊勒敢希鴻澤令樹一碑但
遼海清平久無徵發山東豐稔時踰恒歲况鄒
魯舊邦儒教所起刊勒之費未足為多許其子
來不日便就乞特矜照遂此愚誠臣識昧恒規
言慚通理塵黷聽覽追增竦戰勅旨依請 明
太祖洪武元年二月遣祭酒孔克堅致祭闕里

勅諭曰仲尼之道廣大悠久與天地相並故後
世有天下者莫不致敬盡禮修其禮事朕今為
天下主期在明教化以行先聖之道今既釋奠
於國學仍遣爾修祀事於闕里爾其敬之 成
祖永樂十五年九月御製孔子廟碑文曰道原
於天而昇於聖人聖人者繼天立極而統承乎
斯道者也若伏羲神農黃帝堯舜禹湯文武周
公歷聖相傳一道而已周公沒又五百餘年而

生孔子所以繼往聖開來學其功賢於堯舜故
曰自生民以來未有盛於孔子者也夫四時流
行化生萬物而高下散殊咸遂其性者天之道
也孔子參天地贊化育明王道正彝倫使君君
臣臣父父子子夫夫婦婦各得以盡其分與天
道誠無間焉爾故其徒曰夫子之不可及也猶
天之不可階而升也又曰仲尼日月也無得而
踰焉在當時之論如此亘萬世無敢有異辭焉

於乎此孔子之道所以為盛也天下後世之蒙
其澤者實與天地同其久遠矣自孔子沒於今
千八百餘年其間道之隆替與時陟降遇大有
為之君克表章之則其政治有足稱者若漢唐
宋致治之君可見矣朕皇考太祖高皇帝天命
聖智為天下君武功告成即興大教大明孔子
之道自京師以達天下竝建廟學徧賜經籍作
養士類儀文之備超乎往昔封孔氏子孫世襲

衍聖公秩視一品世擇一人為曲阜令立學官
以教孔顏孟三氏子孫嘗幸太學釋奠孔子竭
其嚴敬尊崇孔子之道未有如斯之盛者也朕
纘承大統丕法成憲尚惟孔子之道皇考之所
以表章之者若此其可忽乎乃曲阜闕里在焉
道統之系實由於茲而廟宇厯久漸見墮敝弗
稱瞻仰往命有司撤其舊而新之今年畢工宏
邃壯觀庶稱朕敬仰之意俾凡觀於斯者有所

興起致力於聖賢之學敦其本而去其末將見
天下之士皆有可用之材以贊輔太平悠久之
治以震耀孔子之道朕於是有深望焉遂書勒
碑樹之於廟并系以詩曰巍巍元聖古今之師
垂世立言生民是資天將木鐸以教是畀謂欲
無言示之者至惟天為高惟道與參惟地為厚
惟德與舍生民以來實曰未有出類拔萃難乎
先後示則不遠日用攸趨敦敘有彝遵於聖模

仰惟皇考聖道實崇禮樂治平身底厥功曰予
祇述詎敢或懈聖緒丕承儀憲永賴巖巖泰山
魯邦所瞻新廟奕奕飭祀有嚴鼓鐘煌煌璆磬
戛擊八音相宣聖情怡懌作我士類世有才賢
佐我大明於萬斯年 成化四年御製重修孔
子廟碑曰朕惟孔子之道天下不可一日無焉
何也有孔子之道則綱常正而倫理明萬物各
得其所矣不然則異端橫起邪說紛作綱常何

自而正倫理何自而明天下萬物又豈能各得其所哉是以生民之休戚係焉國家之治亂關焉有天下者誠不可一日無孔子之道也蓋孔子之道即堯舜禹湯文武之道載於六經者是也孔子則從而明之以詔後世耳故曰天將以夫子為木鐸使天不生孔子則堯舜禹湯文武之道後世何從而知之將必昏昏冥冥無異於夢中所謂萬古如長夜也由此觀之則天生孔

子實所以為天地立心為生民立命為往聖繼絕學為萬世開太平者也其功用之大不但同乎天地而已噫盛矣哉誠生民以來之所未有者宜乎弟子形容其聖不一而足至於中庸一書而發明之無餘蘊矣自孔子以後有天下者無慮十餘代其君雖有賢否智愚之不同孰不賴孔子之道以為治其尊崇之禮愈久而愈彰愈遠而愈盛觀於漢魏以來褒贈加封可見矣

迨我祖宗益興學校隆祀典自京師以達於天下郡邑無處無之而在闕里者尤加之意焉故太祖高皇帝登極之初即遣官致祭為文以著其盛而立碑焉太宗文皇帝重修廟宇而一新之亦為文以紀其實而立碑焉朕嗣位之日躬詣太學釋奠孔子復因闕里之廟歲久漸敝而重修之至是畢工有司以聞深慰朕懷嗚呼孔子之道之在天下如布帛菽粟民生日用不可

暫闕其深仁厚澤所以流被於天下後世者信
無窮也為生民之主者將何以報之哉故新其
廟貌而尊崇之尊崇之者豈徒然哉冀其道之
存焉爾使孔子之道常存而不泯則綱常無不
正倫理無不明而萬物亦無有不得其所者行
將措斯世於雍熙太和之域而無異於唐虞三
代之盛也久安長治之術端在於斯用是為文
勒石樹於廟庭以昭我朝崇儒重道之意焉系

以詩曰天生孔子縱之為聖生知安行仁義中
正師道興起從游三千往聖是繼道統流傳六
經既明以詔後世三綱五常昭然不替道德高
厚教化無窮人極斯立天地同功生民以來卓
乎獨盛允集大成實天所命有天下者是尊是
崇曰惟聖道曷敢弗宗顧予渺躬承此大業惟
聖之謨於心乃愜用之為治以康兆民聖澤流
被萬世聿新報典之隆尤在闕里廟宇巍巍於

茲重美文諸貞石以光於前木鐸遺響餘千萬
年孝宗弘治十七年重建聖廟大學士李東
陽疏請刻御製碑曰先該山東巡撫徐源奏闕
里孔子廟修建落成續該禮部題請御製碑文
及遣官祭告奉旨是遣李東陽祭告臣竊惟修
建孔廟朝廷重事而御製碑文及遣祭祝文尤
陛下隆師重道之盛心是宜刻之金石以昭示
萬世但本廟僻在一方恐無善寫楷書之人不

能揚勵宸章有辜恩典臣奉將使命事體相關
乞令制勅房中書舍人喬宗賁捧前項御製文
字往彼書寫上石仍乞帶領工部文思院副使
閻傑就彼鐫刻事畢之日即令回京該部通行
照例應付廩給脚力制曰可 孝宗御製碑文
曰朕惟古之聖賢功德及天下後世立廟以祀
者多矣然內而京師外而郡邑及其故鄉靡不
有廟自天子至於郡縣長吏通得祀之而致其

嚴且敬則惟孔子為然蓋孔子天縱之聖生當周季聖賢道否之日而不得其位以行乃厯考上古以來聖人之君天下者曰堯曰舜曰禹湯文武已行之迹并其至言要論定為六經以垂法後世自是凡有天下之君遵之則治違之則否蓋有不能易者真萬世帝王之師也故自漢祖過魯之後多為之立廟沿及唐宋英明願治之君屢作益尊而信之孔子之廟遂徧天下爵

號王公禮視諸侯而加隆焉蓋天理民彝之在
人有不能自泯也我皇祖以至神大聖植綱常
於淪斁之餘武功方戢即遣人詣闕里祀孔子
風示天下規度可謂宏遠矣列聖相傳益嚴祀
事先後一軌暨我皇考憲宗詔增廟之舞佾為
八籩豆十二禮樂盡同於天子褒崇之典至是
蓋無以加我國家百有餘年之太平端有自哉
闕里有廟建自前代規制尤盛弘治己未六月

燬於火朕聞之惕然特勅山東巡撫巡按暨布政按察司官聚財庀工為之重建越五年甲子正月工畢巡撫右都御史徐源巡按監察御史陳璘以其狀來上宏深壯麗視舊規有加朕懷乃慰既遣內閣輔臣太子太保戶部尚書兼謹身殿大學士李東陽往告復具顛末為文俾勒之廟用昭我祖宗以來尊師重道之意并繫之詩曰聖人之生天豈偶然命之大君俾贊化權

二帝三王君馬克聖繼天立極道形於政大化既
洽至治斯成巍巍蕩蕩渾乎難名周政不綱道
隨時墜孔子聖人而不得位乃稽羣聖乃定六
經萬世之師於焉足徵自漢而下數千餘歲褒
典代加有隆無替於皇我祖居正體元六經是
師卓爾化原列聖相承先後一揆逮及朕躬思
弘前軌廟貌載崇祀事孔禋經言典訓彌謹彌
敦俗化治成日升川至斯道之光允垂萬世

臣按自黃初俾侯宗聖刻石始承制書乾封追
贈太師樹碑亦奉勅旨累朝刊勒竝出儒臣撰
述厯宋金元但傳祥符一贊至明永樂成化弘
治遂有御製三碑然而視草率由詞苑揮毫付
之中書豈有

天藻宸翰雙輝交美肇自亘古實惟

今日

皇上德躋極天之峻道造逢原之深既博於文復游於

藝

紫極幾暇

黃屋務閒纂堯湯之典誥追羲昊之圖書孔思周情日

新富有而於廟碑

親撰親書發天地之大文兼古今之至美自有

聖廟以來所未覩也而且鑿名山之翠珉陶上方之

碧瓦既發

內府之金重

遣皇華之使周爰咨度俾來以圖曰止曰時可規可矩
乃經始於寅夏爰落成於卯秋碑既屹立亭斯
穹蓋制作大備如睹赤虹黃玉之文苗裔永存
匪同白馬丹書之誓紫微懸映軼賜札之十行
金薤琳琅異寫經之三體爾乃翼凌雲之傑構
靈光遜其歸然承應宿之高覺景福慚於竝峙
軒車塞路但有拜瞻鉛槧徒懷無能仰頌者矣
康熙二十六年丁卯五月十五日廣儲司員外

阜保恭齋到

御製

御書周公孟子廟碑文仍同工部都水司員外郎卞永

式監造

先是山東巡撫張

題為曠典一時竝舉孟廟亦應修葺謹一并

題明恭請

龍章以垂不朽事該臣准到部咨周公廟宇交與該撫

設法修葺等語臣有請者堯舜禹湯文武之道成於周公集於孔子百餘年後百家爭鳴聖教幾熄賴一人焉起而正之者實惟孟子其著書七篇包羅天地揆叙萬類故歷代尊為亞聖者以其大有功於聖教也臣考孟子廟建自宋景祐四年歷代皆加修葺今則牆垣倒塌殿宇傾圯棲石像於小屋仆斷碑於空庭因思

皇上闡明道脈遠紹心傳孔子周公二聖之典禮既崇
則亞聖之廟貌宜肅臣等幸際昌時敢不仰體
聖心設法修葺以襄

盛典擬與周公廟一併鳩工但扁額碑記非

御製宸章無以永垂萬世伏冀

皇上親撰頒賜勒之貞珉奕禩取法無窮聖賢光被不

朽奉

旨該部議奏

禮部

題前事仰惟

皇上天縱聖明勤學稽古紹唐虞之道統闡孔孟之心
傳表章六經垂教萬世崇尚德報功之典弘承
先啓後之模

天章與雲漢同昭

宸翰偕日星竝麗今孟廟既稱修葺允宜

御製扁額碑記永垂不朽俟

命下之日交與翰林院將

御製扁額碑記發出行文該撫製造懸掛刊勒可也奉

旨依議

附錄 古鄒城在今縣東南二十五里嶧山之

陽水經注曰嶧周圍二十里高秀特出積石相

臨殆無土壤石間多孔穴洞達相通有如數間

屋甚奇觀也由山而北羣山絡繹直接四基馬

鞍二山而九龍山之旁有大澤曰溪湖袤廣數

里流為白馬湖西南以達於泗水湖之西孟母
泉出焉孟子舊居在此今子孫世居之 宋仁

宗景祐四年孔道輔守兗州求孟子墓於四基
山得之始就山建廟泰山孫復記曰龍圖孔公
為東魯之二年公聖人之後以興復斯文為已
任謂諸儒之大有功聖門者莫先於孟子吾當
訪其墓而表之新其祠而祀之以旌其烈於是
符下俾鄒之官吏博求之果於邑之東北三十

里有山曰四基得其墓焉遂去榛莽肇其堂宇
以公孫丑萬章之徒配 宋神宗元豐六年封
孟子為鄒國公下制曰自孔子沒先王之道不
明發揮微言以紹三聖功歸孟氏萬世所宗厥
惟舊邦實有祠宇追加爵號以示褒崇元豐七
年始以孟子配享孔廟 元文宗至順二年九
月加贈孟子為鄒國亞聖公制曰孟子百世之
師也方戰國之縱橫異端之充塞不有君子孰

任斯文觀夫七篇之書惓惓乎致君澤民之心
凜凜乎拔本塞源之論黜霸功而崇王道距詖
行而放淫辭可謂有功聖門追配神禹者矣朕
若稽聖學祇服格言乃著新稱以彰渥典於戲
誦詩書而尚友緬懷鄒魯之風非仁義則不陳
期底唐虞之治英風千載蔚有耿光可加封鄒
國亞聖公 宋徽宗宣和四年縣尹朱缶始徙
廟於南門外道左孫傳記畧曰孟子葬鄒之四

基山傍塚為廟歲久弗治廟距城三十餘里先是嘗別營廟於邑之東郭以便禮謁元豐七年詔更新廟貌而地頗湫隘宣和三年縣令朱奎謀諸邑人諸生咸謂廟瀕水亟壞不四十年凡五更修矣若許改卜爽塏之地則願任其事今許之遂徙廟於邑 明孝宗弘治九年修復孟廟至熹宗天啓二年白蓮聞香妖黨突起盤據鄒滕者半載孟廟及中庸書院斷機諸祠悉罹

兵燹一切廟廡垣墉無不殘毀賊平兗守孫朝
肅修復之大學士文震孟為之記 鄒縣治東
舊有子思講堂相傳思孟授受於此元成宗元
貞間縣尹司居敬以縣東南隅暴書臺處世傳
為孟子故宅因建子思祠於暴書臺東榜曰中
庸精舍堂曰淵源實為書院之始張頴記曰鄒
人相傳孟子故宅在縣東南隅其宅前臨因利
溝南揖文賢岡泗川掩抱好事者築暴書臺其

間則昔日故有廬舍又縣治東隙地舊名子思講堂謂孟子傳道於此受學故當在魯豈子思時至鄒耶今千六百餘年邑人猶曰此故宅此講堂洞洞屬屬如將見之可不因人心所向以存其蹟乎東陽司居敬來尹茲邑復故宅遺蹟闢門修垣以表之寄講堂於暴書臺旁名曰中庸精舍子思子南面孟子西向侍皆章甫元端危坐儼然昔日授受之容矣 司尹既去縣尹

宋彰繼之始建講堂於淵源堂之後曰率性堂
又為學官居室於其左齋舍厨庫翼為東西請
於朝總名為中庸書院時成宗大德六年也

元仁宗延祐二年詔改中庸書院額為子思書
院設山長以司祭祀及教事 文宗至順二年
封子思為沂國述聖公 明武宗正德元年以
衍聖公次子襲封翰林院五經博士一員奉子
思書院廟事

臣按宋神宗元豐六年朝散大夫吏部尚書曾
孝寬上言孟軻氏自古嘗以其書置博士朝廷
亦以其書勸學取士而未有封爵載於祀典章
下禮官禮官言孟子傳聖人之道有功天下後
世今若止加廟額侯爵恐未盡褒崇檢會顏子
封兗國公十哲益封郡公欲乞自朝省詳酌特
封公爵以示褒顯天子從之封鄒國公七年以
孟子配享孔子度宗咸淳三年升曾子子思子

竝配孔子位在孟子上初高孝間洪邁嘗謂孟子配食與顏子竝而其師子思子思之師曾子皆在其下於禮儀實為未然至是始以四子竝配此封爵配饗之原始也元祐間龍圖閣學士孔道輔守兗州求孟子墓於四基山就墓旁立廟元豐七年知兗州軍事李挺請曰孟子廟在鄒鎮東北隅制度極陋下仙源縣勘會有室七間皆已倒塌請於修文宣王廟剩錢內支錢三

百貫增修孟子廟以稱今來爵命朝議從之考
鄒自熙寧五年地入仙源此時廟猶在墓前至
後復為縣別營廟於邑之東郭而今南門外之
廟則徽宗宣和四年所移置此祠廟更置之本
末也子思子中庸書院與孟母斷機堂則肇造
於元鄒尹司居敬夫鄒魯授受之迹迥不可追
而講堂故址於一千六百餘年之後人咸稱述
弗忘於斯見大道之不泯於人心而守先待後

聞風興起之說驗矣究守表祠墓於前鄒尹修
書院於後桑梓敬止几杖儼然二賢之功其可
忘乎二千餘年後幸遇我

皇上秉

大聖之制作明斯道之淵源推之孔子之前之後而周
孟二碑同時竝建鄒魯之邦

御碑鼎峙如日月之竝行五星之齊耀風聲所樹已足
振起愚蒙漸被九有矧

錫之敷言發皇震動凡厥庶民靡不是訓是行以近天子之光者矣

康熙三十五年丙子六月國子監祭酒孫岳頒
司業張豫章疏請

皇上以三次

親征勦滅噶爾丹朔漠永清告捷

聖廟且請紀

聖德神功

御製

御書碑文勒石國學

頒示天下

命禮臣議議上

制曰可

遣大學士張玉書祭告

聖廟翰林院侍讀學士史夔祭告

闕里文載第一卷

禮部

題為

聖算無遺

天威遠震凱旋振旅邊徼永清請酌古制告捷學宮事
禮科抄出國子監祭酒孫岳頒司業張豫章題
前事內稱竊惟自古聖帝明王為國計民生謀
久安長治則有負固逆命者必命將出師恭行
天討殲厥醜類以奠安中外然或近在封域之

間非盡遠踰邊庭之界即使躬親韎韐亦必歲久成功故漢之武帝唐之太宗未嘗不開疆拓宇而不能迅奏膚功明之成祖亦屢出塞征討地猶未遠不寧惟是殷高宗之克鬼方也以三年周宣王六月興師以伐玁狁亦僅至於太原而已未有親統大軍出險涉遠不數十日而大功告成廓清沙漠又安邊境如我

皇上之神武首出夔邁百王者也我

皇上自御極以來削平三逆掃蕩臺灣南朔東西並奉
正朔凡戴髮含齒之儔咸思向風而效順乃有
厄魯特噶爾丹者辜恩背德獨自外於聲教狡
謀出沒擾亂邊陲逆天虐民罪在不赦

皇上念逆寇一日不靖則邊氓一日不安非速行勦滅
曷由共享太平雖諸王大臣請緩

親征而

睿謀獨斷衆論不撓且軍儲皆出

卷十
天庾轉餉數十萬石時

頒賞賚師有餘資總以安四海生靈之命綿

宗社無疆之庥故不憚

六飛遠邁身先士卒而天人叶應自誓師以迄大捷僅
七十日耳從此邊塞不聞金鼓之聲斥堠永無
烽火之警胥游化日共樂堯天是從來未有之
大仁也師出之日水凍草枯及

御蹕經臨掘地則泉湧牧馬則草肥蓋天時地脈已早

決於

宸算之中非臣下所能測識萬一且分布諸軍為三路

調度規畫竝出

皇上之指授噶爾丹既凜

天威之降臨復聞大軍之四繞釜炊不及餐妻孥不暇

顧棄而宵遁自謂可以免脫不知

神策秘謨預定於前逆寇西奔

天戈東指諸軍會合環而擊之背水阻山擒斬殆盡餘

黨星散絡繹就降子女牛羊俘獲無算搗其巢
穴沙磧一空是從來未有之大智也巴顏烏喇
黑魯倫河等地最為險遠行間持戟尚憚馳驅
乃

皇上親舉玉趾櫛風沐雨日進一餐勞苦與軍士共之
率數十萬貔貅之衆踰天山渡瀚海如履平地
而走康莊莫不忠義激發驍騰百倍兵刃未接
先已披靡乘勝窮追摧枯拉朽逆寇既就滅亡

塞外諸藩益復畏威懷德是從來未有之大勇也十五日

午門宣捷二十三日又

午門宣捷跪聽嵩呼誠懼誠忭凡屬臣民舉翹首

皇上回鑾告成功以彰顯烈臣等一介腐儒荷蒙

聖恩簡擢不獲負弩執矢効力塞外伏查禮記王制曰

天子出征執有罪反釋奠於學以訊馘告即魯

頌泮水之詩亦曰矯矯虎臣在泮獻馘淑問如

臯陶在泮獻囚是三代時告捷於學也漢唐以來僅於丹鳳樓前及午門外受俘未有告成於國學者似於詩禮為未符

皇上建千古未有之功則漢唐未舉行之盛事請自皇上始之即

聖朝寬仁不必有事於訊馘而專行釋奠之禮昭告

文廟勒石太學原本六經非由臆說不妨與祭告闕里竝行將見文德武功益光昭史冊於無既矣

臣等愚鈍無知遭際

聖明謹據經生之見仰塵

天聽因係條陳事宜字多踰格如果

臣

言可採伏祈

勅部議覆施行康熙三十五年六月二十五日題七月

初四日奉

旨該部議奏欽此欽遵於本月初五日到部該

臣等議

得國子監祭酒孫岳頒司業張豫章疏稱我

皇上自御極以來削平三逆掃蕩臺灣凡戴髮含齒之

儔咸思向風而效順乃有厄魯特噶爾丹者辜
恩背德逆天虐民罪在不赦

皇上念逆寇一日不靖則邊氓一日不安故不憚

六飛遠邁身先士卒而天人叶應自誓師以迄大捷僅
七十日耳師出之日水凍草枯及

御蹕經臨掘地則泉湧牧馬則草肥蓋天時地脈已早
決于

宸算之中非臣下所能測識萬一噶爾丹釜炊不及餐

妻孥不暇顧棄而宵遁自謂可以免脫不知

神策秘謨預定於前諸軍會合環而擊之餘黨星散絡

繹就降子女牛羊俘獲無算搗其巢穴沙磧一

空逆寇既就滅亡塞外諸藩益復畏威懷德

午門宣捷跪聽嵩呼誠懽誠忭凡屬臣民舉翹首

皇上回鑾告成功以彰顯烈伏查禮記王制曰天子出

征執有罪反釋奠於學以訊馘告即魯頌泮水

之詩亦曰矯矯虎臣在泮獻馘淑問如臯陶在

泮獻因是三代時皆告捷於學也

皇上建千古未有之功則漢唐未舉行之盛事請自

皇上始之即

聖朝寬仁不必有事於訊馘而專行釋奠之禮昭告

文廟勒石太學原本六經非由臆說不妨與祭告闕

里竝行將見文德武功益光昭史冊於無既等

因前來查祭告闕里

臣部以

聖謨廣運等事一疏請

旨俟

命下舉行外其祭酒孫岳頒等所請不必有事訊馘專

行釋奠之禮查康熙八年四月內

皇上親詣太學舉行釋奠在案仰惟我

皇上親統六師將噶爾丹刻期勦滅武功既盛大德益

彰應

遣大臣一員詣

文廟祭告成功自

皇上徂征以至

回鑾一切

訐謨勝算及將士之踴躍百神之効靈允宜纂集大綱
進呈

御覽勒石國學更將碑文摹搨頒發各直省總督巡撫
轉發各府州縣學俾萬代士子咸知

皇上遠踰瀚海迴出絕域屏去幃幄晝夜躬擐甲胄身
先士卒

聖武神謀殄滅逆寇創此開闢以來未有之盛烈也恭

候

命下虔辦祭品選擇吉日

遣大臣之處由太常寺衙門啓

奏其告祭祭文勒石碑文由翰林院撰擬呈

覽其碑石由工部備辦勒石之處交與國子監刊刻俟

勒成之日摹搨轉送臣部頒發直省可也臣等

未敢擅便謹題請

旨康熙三十五年七月十五日題三十六年六月初六

日奉

旨依議

附錄 詩魯頌泮宮曰矯矯虎臣在泮獻馘淑

問如臯陶在泮獻囚毛公傳曰囚拘也鄭康成

箋云馘取格者之左耳囚所虜獲者僖公既伐

淮而反在泮宮使武臣獻馘又使善獄之吏獻

囚孔穎達正義曰釋詁云馘獲也皇矣傳曰殺

而獻其左耳故云馘所獲者之左耳謂臨陣格殺之而取其左耳也囚所虜獲者謂生執而係虜之則所謂執訊者也 禮記王制曰天子將出征類乎上帝宜乎社造乎禰禡於所征之地受命於祖受成於學出征執有罪反釋奠於學以訊馘告鄭氏於受成於學註曰定其謀也釋菜於學二句註曰釋菜奠幣禮先師也訊馘取生獲斷耳者孔穎達正義曰受成於學者謂在

學謀議兵事好惡可否其謀成定受此成定之
謀於學裏故云受成於學 出征執有罪者謂
出師征伐執此有罪之人還反而歸釋菜奠幣
在於學以可言問之訊截左耳之馘告先聖先
師也 又曰案周禮宗伯師還獻愷于祖司馬
職云愷樂獻于社此記不云祖及社者文不具
周禮不云獻愷於學者亦文不具

臣按猾夏之咨征苗之役見於虞書鬼方之伐

垂於易象儼狃于襄昆夷之喙荆舒之懲撻伐
之績著於雅頌自古聖帝明王盛德大業昭垂
經籍者曷常不以攘外安內為亟亟哉然率由
命將徂征未聞親臨絕域亦且積有歲月然後
克之不過驅之遠遁受其歸款未聞盡其種類
殄滅無遺者至於獨斷之決料敵之明成功之
速戰必勝攻必取俘其子息殲厥渠魁一勞永
逸而且心切好生恩敷竝育受數百萬之降闕

數萬里之地則自五帝三王以來未有如我

皇上親征之役功最高德最厚者也伏稽釋奠於學以
訊馘告之文載在王制獻囚獻馘魯頌歌之典
綦鉅矣而三代以下未有行之者豈惟古禮久
湮罕能修舉良由後世帝王功烈卑淺不足以
稱此隆儀也幸遇

聖朝初行此禮詎非超越萬古之盛事哉吾夫子自言
以戰則克而春秋之作尤謹內外之防然則

皇上之天威遠震建此大功與

先聖之心若合符節固有默契焉者匪獨聲靈之赫濯而已也臣等跼伏東魯俯慚儒懦不能執爰屬鞬効力疆場親見

聖天子廟謨之神妙功業之崇隆第伏讀諸臣恭賀大捷之疏懼忤踴躍不能自禁念自


先聖立廟學宮以來數千餘年乃得覲茲曠典洵屬萬世未有之遭逢且仰見我

皇上文德武功事事皆傳

聖人之心法上邁唐虞三代之隆而

奎章

宸翰亦且與典謨雅頌照耀兩間乾坤俱永矣



幸魯盛典卷十四

欽定四庫全書

史部

幸魯盛典卷十五

詳校官宗人府丞臣實光鼎

編修臣程嘉謨覆勘

總校官進士臣繆珙

校對官助教臣胡子襄

謄錄舉人臣李椿

欽定四庫全書

幸魯盛典卷十五

康熙二十八年己巳秋八月

詔修闕里孔子廟

衍聖公

臣孔毓圻

奏為

聖王重道極隆願請

勅修闕里

聖廟以光

盛朝大典事

臣

竊惟我

皇上以不世出之聖當大有為之時文治炳隆聲教翔洽亘古燦今參天兩地蓋

先聖集堯舜禹湯文武周公之道而

皇上更統備堯舜禹湯文武周公之全惟

聖知聖惟道重道務極效法敦崇以勵世善俗是以

恩數超軼百代

典章炳煥千秋大矣至矣蔑以加矣而臣更有請者

臣按闕里

聖廟歷代以來凡遇隳敝例由襲封之臣報明上請
或撤舊更新或因仍修葺所以歷年逾久廟貌
常新今按廟自明季弘治十七年被災重建歷
今三百年歲月久遠日漸毀敝殿寢多有漏損
廊廡皆已傾頽齋舍全荒舊亭廢墜邇年以來
尤極敝壞不堪及時修理似不容緩臣伏思天

下州縣文廟仰賴

皇上盡皆修整完備况茲闕里興聖之區關係尤重幸

遇

皇上聖明在上千載一時正廟貌重新之日宮牆完美

之期也

臣

特敢備悉情形亟行陳請伏乞

皇上睿鑒施行康熙二十八年六月二十日題本月二

十九日奉

旨該部議奏

禮部

題前事該

臣

等議得衍聖公孔毓圻疏稱闕里

聖廟加恩聖裔尊崇之典例由襲封之臣報明上請
廟自明季弘治十七年被災重建歷今三百年
歲月久遠日漸毀敝殿寢多有漏損廊廡皆已
傾頽齋舍全荒舊亭廢墜邇年以來尤極敝壞
不堪及時修理似不容緩等因前來竊惟

皇上尊師重道

駕幸闕里釋奠

先師歷代以來凡遇隳敝無所不極今衍聖公孔毓圻既稱闕里

聖廟歲月久遠漏損傾頽等語理應工部差官勘明確估將修理之處議覆但今值

大行皇后喪禮工部事務繁多應暫行停止可也康熙二十八年七月二十三日題八月初五日奉

旨闕里聖廟崇奉

先師萬代瞻仰今既日漸毀敝理宜修葺著差工部
內務府官員前往確估到日再議具奏

九月

遣內務府郎中阜保工部郎中壽鼎赴闕里

聖廟估計十二月阜保等賫

聖廟估計冊回京復

命康熙二十九年庚午工部議以今年不宜蓋正請將

闕里

聖廟修理暫行停止

上命再議

工部等衙門為請

旨事闕里

聖廟估計修理之處內務府郎中阜保筆帖式王世
遵工部郎中壽彝筆帖式班塔等俱騎驛馬前
往等因康熙二十八年九月二十三日題本日
奉

旨依議

工部為請

旨事衍聖公孔毓圻疏稱闕里

聖廟敝壞等因禮部議覆修理之處暫行停止奉

旨闕里聖廟崇奉

先師萬代瞻仰今既日漸毀敝理宜修葺著差工部

內務府官員前往確估到日再議具奏欽此欽遵隨

差內務府郎中早保

臣

部郎中壽鼎估計去後

于康熙二十八年十二月十三日郎中阜保壽
鼎回來料估之處轉奏奉

旨將料估之處交與該部等因到部查得郎中阜保等
估內共需用大小松檟木九千八百餘件架木
一萬三千三百餘根城磚方磚沙滾子磚斧刀
磚共十五萬四千二百餘件布筒板瓦七萬六
千六百餘件白灰三百九十萬四千二百餘觔
各項匠役九萬三千二百餘工壯夫四萬六千

四百餘工其大成殿大成門琉璃瓦脊料全換
并換圍房脊料鑲邊瓦共琉璃瓦二十萬三千
二百餘件等因該_臣等查得郎中阜保等估計
內需用琉璃瓦料松檟木植架木之數甚多一
時難以挽運且今年不宜蓋正將修理闕里
聖廟暫且停止俟修理之日將修理之處再行詳確
估計議覆可也康熙二十九年二月初二日奉
旨明年修造之處再議具奏

工部

題為請

旨事先經

臣

部具奏修理闕里

聖廟據郎中阜保等估冊內需用琉璃瓦料松檟木
植架木之數甚多一時難以挽運且今年不宜
蓋正將修理闕里

聖廟暫且停止俟修理之日將修理之處再行詳確
估計議覆等因繕寫摺子具奏奉

旨將明年修理之處再議具奏欽此欽遵隨行欽天監
選擇明年修理吉期去後據欽天監文內開康
熙三十年四月十二日丁卯宜用未時修理闕
里

聖廟吉先從東南巽方動土起吉等語該_臣等再議
得先經_臣部以今年不宜蓋正將闕里

聖廟修理之處暫行停止等因具奏奉

旨將明年修理之處再議具奏欽此查得郎中阜保等

估計帶來冊開闕里

聖廟大成殿等殿五十四間大成門等門六十一間
圍房八十八間內挑換朽爛櫨柱望板椽子等
木拆卸瓦片重寬照原舊油飾彩畫修理等語
其修理所需顏料銅鐵等項于戶部支取不算
價值外共用松櫨木植九千八百六十八根價
銀二萬四千三百二十四兩八錢杉木櫨木榆
木一百三十根價銀一百八十一兩五錢琉璃

瓦料二十萬三千二百九十七件價銀三萬一
千八百四十五兩磚瓦二十三萬九百二十八
個價銀三千四百八十九兩六錢九分六釐白
灰三百九十萬四千觔價銀四千九百十九兩
零四分繩觔蓆片家伙等項價銀一千七百二
十兩打造銅鐵等項匠役工價併煤炭價銀二
千七百六十七兩四錢各項匠夫工價銀一萬
六千七百七十兩零六錢四分五釐以上共需

用物料價值銀匠夫工價銀八萬六千零十八兩零八分相應差總管內務府官一員臣部司官一員照欽天監所擇于康熙三十年四月十二日開工所用磚灰瓦繩蓆家伙等物煤炭價值併各項匠夫工價銀兩行文山東巡撫動用司庫錢糧交與管工官預行燒造磚瓦灰勦備辦物料其匠夫開工之時催覓修理查先造闕里

聖廟碑亭所用琉璃瓦料于回空糧船裝載運至濟
寧州今修理需用琉璃瓦料松木檟木杉木等
木顏料等項預備得日交與倉場侍郎于回空
糧船裝載運至濟寧州此等物料差出官員前
往驗收會同濟寧道自泗河僱覓運至關里工
所又查得江南江西湖廣浙江歷年解京架木
各一千六百根此四省所解架木六千四百根
行令各該巡撫將康熙二十九年分應解架木

照數于本年內送至關里工所此修理之處令
管工官員敬謹堅固修理工完之日將實用過
錢糧細數造冊到部確查銷算具題可也康熙
二十九年二月十八日奉

旨修理關里

聖廟所用物料工價不必動支部內錢糧照數發內
帑銀兩採辦修理其物料著令回空糧船載運餘依
議

夏六月

遣內務府廣儲司郎中阜保工部虞衡司郎中阿爾輝
內務府筆帖式王世遵工部筆帖式查爾奇昂
吉圖監督修理

聖廟八月阜保等至曲阜九月回空糧船運琉璃瓦
料松木檟木杉木顏料物料至濟寧州江南江
西湖廣浙江所解架木六千四百根亦至郎中
阜保等驗收同濟寧道韓作棟等由泗河運至

兗州府由兗州府起車運至闕里康熙三十年
辛未夏四月十二日丁卯郎中阜保阿爾輝督
同濟南府同知金世揚兗州府通判許嗣華曲
阜縣知縣孔尚愉等起工修理

聖廟康熙三十一年壬申秋八月二十日丁酉告成
附錄 宋文帝元嘉十九年詔魯郡修孔子廟
及學舍 齊世祖永明七年詔曰宣尼誕敷文
德峻極自天發揮七代鈞陶萬品英風動舉素

王誰匹功隱於當年道深於日月前王敬仰崇
修寢廟歲月亟流鞠為茂草今學校興立實稟
洪規可改築宗祊務在爽塏 唐高宗乾封元
年詔大修文宣公廟以兗州都督霍王元軌董
其役 懿宗咸通七年鄆曹濮等州觀察使孔
溫裕上修廟奏狀周太祖廣順二年勅兗州修
葺孔子祠廟 宋太宗太平興國八年詔近臣
曰朕嗣位以來咸秩無文徧修羣祀惟魯之夫

子廟堂未加營葺闕孰甚焉可詔大將作恢敞
儒宮 真宗天禧五年詔以封禪行宮遺材於
轉運司支官錢修葺 神宗元豐元年詔兗州
以省錢修葺宣聖祠廟先是州縣憚於申請廟
久不修至是始完葺 元豐五年詔轉運使於
絲絹錢內支錢二千貫又賜度牒三十本給兗
州重修本廟及於本路雜差役兵士工匠等以
四十七代孫孔若升監修 徽宗政和元年令

運司於係省錢內應付修完本廟及於本路諸
州軍差雜役兵士工匠和僱百姓修造委四十
八代孫孔端友監修 金熙宗皇統元年詔於
行臺撥錢一萬四千貫修理聖廟委四十九代
孔環監修并禁官司侵占聖廟地者著為令甲
章宗明昌元年詔曰比聞曲阜縣孔聖廟興
蓋多年廡門位次阨陋極壞蓋彼處官提控修
補所用錢於泰山香錢內支如以後更有損壞

委本縣申部支錢修補又令夫子廟係省錢修蓋有司出錢七萬四百貫有奇擇幹臣典領匠役制度大備於歷朝元世祖至元四年東平路曲阜縣尹兼主祀事孔治請將宣聖廟奎文閣廟學等修蓋奏准委官張煥與達魯噶齊管民官估計合用磚瓦木植等物價銀錢鈔五十六錠四十餘兩又於本路歷日錢內支鈔二十錠仍委能幹人員與總管府委定官員并曲阜

尹兼主祀事孔治等起蓋奎文閣杏壇齋廳覺
舍皆即舊而新之而殿廡未及 成宗大德元
年大中大夫濟寧路達魯噶齊阿勒坦布哈行部
至曲阜瞻拜祠下見其荒涼乃上言願自修葺
一切所資首先出備如有不敷勸率好事者捐
助申准許令修蓋遂自輸錢幣萬緡儲材選匠
間忽奉御史臺參詳祖庭林廟與他處不同修
理盛事當出自朝廷不可使臣下獨專其美奏

罷之大德四年工部符下官為給降錢物命阿
勒坦布哈詣闕里度工起蓋十二月欽奉詔書不
急之役停罷五年奉中省判送本部參詳濟寧
路奉詔書時聖廟工役已及八分若今住罷經
值霖雨損壞就用元化錠鈔僱工修蓋於六年
九月落成費十萬金有奇 明太祖洪武七年
衍聖公孔希學奏請修理聖廟奉旨明年時和
年豐與他修造洪武十年布政司委兗州判官

袁良督所屬州邑鳩工修理踰三月而成 二
十九年諭工部侍郎秦達闕里先聖降神之地
廟宇廢而不修何以妥神靈昭來世爾工部即
為修理以副朕懷遂差行人張敏引工匠千人
修蓋一新 成祖永樂九年衍聖公孔彥縉咨
部以祖廟洪武年間修理經今年久殿宇廊廡
樓閣等毀壞共四十六處計二百八十七間工
部覆奏於永樂十年撥囚三百三十名遣行人

雷迅管領赴廟修理迅核洪武年修廟係孔氏族人孔思用等提領修蓋具奏永樂十三年正月奉旨工部照洪武年間例與他修蓋法司裏撥一千名囚人著孔家自管原去的行人著回來乃委族人孔思桓督修本年十二月奉旨孔廟是致敬去處囚人每作踐不便恁每還著文書鋪馬裏去問工部家怎麼只撥這幾個囚人去修幾時得完便著山東布政司官一員與曲

阜知縣孔克中隸齊民三千人典役於廟仍令
囚人聽役於外至永樂十五年畢工 英宗天
順八年詔巡撫山東都察院左副都御史賈銓
重修闕里先聖廟 憲宗成化十九年衍聖公
孔弘泰因廟制年久請復修廣乃命方面官督
營造之役 孝宗弘治十二年六月孔廟災燬
殿廡等處一百二十三間御史余濂題請重修
奉旨該衙門看了來說禮部尚書徐瓊等覆奏

令巡撫都御史何鑑親詣災所相計該造殿宇
廊廡碑亭等合用料價工食銀兩共該一十五
萬二千兩有奇遂將荊州蕪湖杭州各抽分廠
木植江西九江蘇州許墅并臨清鈔關船料錢
鈔及山東起運夏稅折鈔戶口食鹽并各司府
在庫無礙錢糧委官前去提取支用委布政司
叅議程愈按察司僉事李宗泗按察司僉事黃
繡督工始工於弘治十三年二月訖工於十七

年正月

臣按水經注孔廟即夫子故宅宅大一頃後世
以為廟廟屋三間而已此魯哀公即孔子宅立
廟以祀之遺制也司馬遷登夫子講堂觀車服
禮器諸生以時習禮於此輒低徊留之不能去
祠宇雖隘而去古未遠其流風遺教淪浹於人
心者如此其至也漢章帝幸宅祀孔子及七十
二弟子作雲門咸池韶濩六代之樂於時萬乘

親臨六軍扈蹕生徒樂懸畢集於庭則廟寢當
已恢廓非復從前樸陋而考漢世別無修廟之
文魏黃初二年始詔魯郡修起舊廟又於其外
廣為學舍自後代有修葺至唐擴正廟為五間
兩廡二十餘間後為寢廟前為廟門規制寢大
洊厯數朝踵事增華至於宋金元明制度弘敞
已倍於昔後復移城衛廟闢廟以南之隙地入
於櫺星門內延袤益廣林木蒼鬱重門洞達真

為萬仞之宮牆矣廟制既大易以頽壞列代以
來或曠世而一修或數年而輒舉載諸廟誌釐
然可考若夫補塞塗茨隨時繕治亦有如孔溫
裕之自出私財阿勒坦布哈之率先倡助者然元
之臺臣有言祖庭林廟與他處不同修理盛事
當出自朝廷不可使臣下專其美可為獨議大
體千古不易之正論矣以後廟當修復襲封之
臣必以上請明洪武時請者為衍聖公孔希學

永樂時請者為衍聖公孔彥縉天順時請者為
衍聖公弘泰蓋請命於朝所以重

聖廟

皇上本尊聖之

淵衷軫遺祠之隳敝鑒前代修建經費出於雜稅工徒
役於民間遷延歲月徒循具文責成地方動多
草率或旋作而旋罷或工完而輒毀非所以妥
神靈昭來世也於是

俞衍聖公孔毓圻之請章下所司時部臣請暫停止

皇上排衆議而力行

遣官估計估計已定又有以天時不宜蓋正為言者
皇上命欽天監擇日於來年起工而先一年預發帑金
庀治工料其材木琉璃瓦料及丹漆銅鐵諸物
皆於漕艘運載至濟寧由濟而水運至兗由兗
而陸運至闕里又截留江楚南浙四省歲輸架
木同時畢至凡茲擘畫之盡善咸本

睿慮之周詳監督諸臣奉

命而行不越二年大工告竣蓋維時和年豐雨暘時若
故趨事赴工百毀具舉不役一夫不擾一物不
勞而理不速而成於是四方觀化咸仰

聖聰率土聞風羣歌

帝力蓋自有

聖廟以來歷經修建從未有

特發帑金專官監督刻期竣事盡善極畢如今日者

矣

九月初六日壬子衍聖公孔毓圻率族屬翰林
院五經博士孔毓埏太常寺博士孔毓琮國子
監博士孔尚任國子監博士孔尚鉉候選州同
孔聞訥等候選知縣孔尚基等舉人孔毓榮等
歲貢生孔衍經等生員孔聞賢等奉祀生孔尚
元等凡一百十六員名赴

闕謝

恩

上命賜宴於禮部

衍聖公

臣

孔毓圻

奏為

廟工告成微

臣

恭率族屬匍匐

闕下叩謝

天恩事康熙二十八年九月蒙

皇上遣內務府廣儲司郎中

臣

阜保工部營繕司郎中

臣
壽鼎前赴闕里

聖廟估計修葺於二十九年七月奉

旨遣內務府廣儲司郎中阜保工部虞衡司郎中阿爾

輝監督工役於三十年四月起工今於三十一

年八月報完訖臣欽惟我

皇上

執中立極

廣運乘時

位在德元既參天而兩地

道綜羣聖實作君而作師致邳隆而幾刑措上臻熙
熙皞皞之風由成功而煥文章端邁蕩蕩巍巍
之盛遠人歸化徧於日出之區視民如傷屢下
蠲租之詔遂使含哺鼓腹之倫咸蒙恬冒海晏
河清之宇共樂昇平文治莫備於今日而重道
彌勤於

聖衷以闕里為毓

聖之域固祠宇之宜崇亦宮牆當

清蹕之臨豈汙萊之弗剪

特遣天使相度工程旋發水衡以為備物朱提十萬皆

頌

內府之金碧瓦千車盡出

尚方之賜巨材運以漕艘架木輸於外省以至銅鉛

丹漆咸採厥土之良匠作工徒亦選冬官之勝

若夫廩餼僱直之微扉屨餼糧之細悉歸經費

仰給羨錢纖毫不擾民間地方不知工作凡茲
經畫之盡善皆本

睿慮之周詳而

臣

阜保

臣

阿爾輝等肅將

欽命晝夜靡寧監理大工成功甚速由是殿廡輪奐昭
車服禮器之遺堂寢深嚴容宗廟百官之富飛
甍傑閣朗耀奎文碧檻層扉增輝魯壁重光塑
像羹牆之色儼臨整飭講壇詩禮之風如溯塗
茨丹雘無非見聖之思盡美極華允稱安神之

地謁者斂容以對越觀者駭矚而怡愉靡不感
仰

皇恩歡呼

帝德蓋自建

廟以來從未有完美莊嚴如今日者洵極天壤之大

觀亘古今而罕覩者矣臣生逢

聖世歷被

寵榮茲更蒙

恩修理祖廟

大典事闕天下而遭遇幸在微

臣臣

即捐糜頂踵未

由仰報

高深惟慶

作覩重新振儒風於四表

貞恒永固祝

聖壽於萬年率土咸依名言莫罄今當完工落成之日

臣謹率族屬翰林院五經博士

臣

孔毓埏等匍

匄

闕下叩謝

皇上隆恩為此具本跪捧恭

謝康熙三十一年九月初六日題本月初十日奉

旨覽卿奏謝知道了該部知道

工部

題為請

旨事該_臣等查得修理闕里

聖廟大成殿等殿五十四間大成門等門六十一間
兩廡八十八間共房二百零三間櫺星門一座
牌坊二座龕案一座原估需用物料匠夫銀八
萬六千零十兩八分交與內務府郎中阜保臣
部郎中阿爾輝等修理去後今工完據郎中阜
保等造具細冊呈報到部照例核算除戶部取
用顏料銅鐵等項及湖廣等四省解到架木不
算價值并泗河僱覓船車裝載木植琉璃瓦顏

料等項運價令山東巡撫另行題銷外辦買用
過松檟木植銀二萬四千三百二十四兩八錢
杉木榆檟木銀一百八十一兩五錢琉璃瓦料
銀三萬一千八百四十五兩磚料布瓦銀三千
五百二十一兩一錢三分六釐白灰銀四千七
百十五兩八錢八分九釐繩筋葦席銀一千六
百零二兩一錢七分六釐家伙葦簾等項銀一
百零八兩三錢打造銅鐵物料工銀一千九百

六十一兩六錢四分七釐各項匠夫工價銀一
萬五千八百五十八兩零一分五釐共實用過
銀八萬四千一百十八兩四錢六分三釐與例
相符應准開銷節省銀一千八百九十九兩六
錢一分七釐令管工部郎中阜保等繳回

內帑餘剩松木一百十九根半江米九斗七升二合
五勺鐵二千三百四十八觔十二兩存貯

聖廟如有應用之處令其應用其長短架木八千一

百八十七根行令山東巡撫速行運至張家灣
木廠可也康熙三十二年二月二十二日題本
月二十五日奉

旨依議

工部

題前事該

臣

等議得山東巡撫桑格疏稱修理

聖廟運送物料動用地丁銀三千兩自濟寧運至滋
陽水路八十五里運過物料用銀一千二百三

十三兩九錢零自滋陽運送曲阜縣陸路三十里用銀一千一百二十三兩七錢零共用銀二千三百五十七兩六錢零餘剩銀六百四十二兩三錢零應彙行解部等因造冊具

題前來查該撫將所用物料陸路水路運送腳銀既經查核題明應准開銷餘剩銀六百四十二兩三錢零應解戶部可也康熙三十二年三月初七日題本月初九日奉

旨依議

附錄 明成祖永樂十五年五月修理孔廟畢
工衍聖公孔彥縉率知縣孔克中及族人等奏
謝命頒膳於光祿復賜宴於禮部仍命衍聖公
孔彥縉知縣孔克中上殿面對 孝宗弘治十
七年五月重建孔廟成衍聖公孔聞韶上表奏
謝曰伏以文教誕敷離照普臨於海宇儒宗大
慶鼎新復見於宮牆誠千載之偉觀匪一家之

私幸光覃鄒魯遠邁金元茲蓋伏遇陛下體備
中和志兼謨烈乾綱獨運闢四門以廣忠言渙
號孔揚奉兩宮而隆孝治登延耆俊屏斥異端
講籍田之禮以厚民生却貢獻之私而恢邦計
加崇釋奠重師表百王之功常御經筵究剛述
六經之旨當廟宇落成之日應治元初紀之期
載念先皇舉斯盛典屢勤大吏督彼羣工出官
帑以佐經營發役人以充輸作禮庭中起視昔

有加寢殿相高於文斯稱像設儼衣冠之肅歲
時增俎豆之輝文星遠映乎奎壁化雨再沾於
洙泗總賴乾坤之力致茲輪奐之休臣爵與上
公身叨主祀孔林無恙企聞詩聞禮之風闕里
有嚴愧肯構肯堂之業侍虞庠而觀盛舉已被
鴻恩瞻嵩嶽以祝蕃釐載申微悃伏願配乎天
配乎地慶無疆之治於一人作之君作之師享
有道之長於萬世

幸魯盛典卷十五

欽定四庫全書

幸魯盛典卷十六

康熙二十九年庚午四月世襲翰林院五經博士孔毓埏請創建述聖廟

詔許之

世襲翰林院五經博士加六級

臣

孔毓埏謹

奏為述聖未有專廟懇

勅鼎建以隆祀典事伏念

臣

祖述聖子思子乃至聖之

嫡孫家學淵源授受最真且從學於曾子傳道
於孟子晚年作中庸一書極天人性命之精微
與大學論孟並垂學宮其功較諸賢猶稱最著
至宋大觀二年始從祀孔廟端平二年陞入十
哲咸淳三年又陞入四配在顏曾孟三賢之列
蓋其道德相同則其食報似不可或異今顏曾
孟三賢自孔廟配享之外又各有

勅建專廟故錄其子孫世為五經博士主奉祀事今

臣

亦蒙

聖恩備員博士而

臣

祖子思子獨未有專廟每至春秋

丁期俎豆闕如備查顏曾孟三廟之制皆前有
殿而後有寢列及門之賢於廊廡又別立祠宇
竝祀三賢之父若母今子思既無專廟而其父
伯魚以大聖為父以大賢為子乃不得如顏路
曾點孟孫氏者享一日堂上之尊其母與夫人
亦不得各備寢位之榮即門人如孟子者亦不

得侍坐於師側曠古缺典未有如斯之甚者也
幸遇我

皇上重道崇儒研精經傳以治術而闡心法以君道而
行師教凡前代未舉之典靡不燦然明備其於
魯之周公廟鄒之孟子廟及先儒書院等處既
皆修葺一新竝

賜勅撰碑文及

御書匾額近又蒙

特發帑金庀材儲料重修臣始祖先師孔子廟伏考歷

代

帝王加意聖門隆恩厚賚如我

皇上今日者實所罕覩臣今祖子思子未有專廟是數

千年之闕畧留以待今日臣不於此時懇請更

俟何時是以不揣卑微冒昧上瀆伏乞

皇上垂念子思子傳道之功准照顏曾孟三賢祀典許

其一體設立專廟其廟基即在闕里孔廟西北

之隅臣衙署之左與顏廟相為輔翼至於建造之資臣不敢再望

內帑亦不敢重煩有司祇用孔廟之殘材餘料其不足者臣自行設處積年累歲漸就規模以為臣奉祀獻爵之地但望

皇上恩比周公孟子兩廟及先儒書院之例亦

勅撰碑文

御書匾額以照耀四海垂示來茲則述聖之道德彌光

而萬世之祀典攸賴矣康熙二十九年三月二十六日奏四月初五日奉

旨該部議奏欽此欽遵於本月初六日到部該_臣等竊
考子思子從祀孔子廟自宋大觀二年始至端
平初陞入十哲祀於堂上咸淳初同曾子陞入
顏孟之列是為四配而顏子廟初建於兗在唐
開元二十七年嗣建於曲阜在元泰定三年孟
子廟建於鄒縣在宋景祐四年曾子廟建於嘉

祥縣志稱朔始無考至明正統以後屢經修葺
惟子思子向未有專廟元元貞初因鄒縣舊有
子思講堂祠後改稱書院明正德元年始以衍
聖公次子世襲五經博士奉鄒縣書院祀事而
曲阜之廟祀缺焉今博士孔毓埏疏稱數千年
之缺畧留待今日乞照顏曾孟三賢祀典一體
立廟廟基即在闕里西北隅其建廟之資自行
區處應如所請倣顏曾孟三廟規制建立子思

子廟春秋致祭載諸祀典至於疏請

勅撰碑文

御書匾額用以昭示來茲應俟廟宇報竣到部之日

臣

部恭請

睿裁康熙二十九年四月二十一日題本月二十三日
奉

旨依議

附錄

宋馬端臨經籍考子思子七卷晁氏曰

魯孔伋子思撰載孟軻問牧民之道何先子思
子曰先利之孟軻曰君子之教民者亦仁義而
已何必曰利子思曰仁義者固所以利之也上
不仁則不得其所上不義則樂為詐此為不利
大矣故易曰利者義之和也又曰利用安身以
崇德也此皆利之大者也溫公采之著於通鑑
夫利者有二有一己之私利有衆人之公利子
思所取公利也其所引援易之言是也孟子所

鄙私利也亦易所謂小人不見利不勸之利也
言雖相反而意則同不當以優劣論也 楊時

曰孔子歿羣弟子離散分處諸侯之國雖各以
所聞授弟子然得其傳者蓋寡故子夏之後有
田子方子方之後有莊周其去本寢遠矣獨曾
子之後子思孟子之傳得其宗子思之學中庸
是也 朱熹曰曾子大抵偏於剛毅這終是有
立脚處所以其他諸子皆無傳唯曾子獨得其

傳到子思也恁地剛毅孟子也恁地剛毅惟是有這般人方始轉合得著惟是這剛毅之人方始立得定子思別無可考只如孟子所稱如標使者出諸大門之外北面再拜稽首而不受如云事之云乎豈曰友之云乎之類這是甚麼剛毅黃幹曰論道統至于子思則先之以戒懼謹獨次之以智仁勇而終之以誠至於孟子則先之以求放心次之以集義終之以擴克此又孟

子之得統於子思者然也

臣按子思子親炙

聖祖卒業曾門弘詩禮之訓紹一貫之傳闡義利之
辨授之孟氏於吾道絕續之關承先啓後以一
身任之使聖人之道昭垂萬古其功最鉅宋儒
楊時稱其獨得聖學之宗朱熹尤極推其剛毅
有以也抑臣於其居衛一節窺見其學力堅定
忠義凜然有非後世慷慨激烈之士所能及者

至今讀其言曰如彼去君誰與守明乎義之無所逃而節之不可奪也豈非傳

先聖事君以忠之家法而立萬世人臣之鵠者歟顧歷代追崇視諸賢獨後且廟貌缺如豈非極盛之舉固留以待超越百王之

聖主乎今博士_臣毓埏具疏籲

恩即奉

俞綸准其建造_臣毓埏鳩工庀材者數年矣數千年未

舉之典禮創見於

聖朝而四配之廟乃全備無缺子思子始獲有棲神之地而伯魚始得享推恩之榮於是羽翼

聖廟猶四時之成歲序四瀆之奠坤輿代嬗無窮流行不息於萬斯年聖賢之道統皆載

天澤之汪洋以永垂不朽矣

康熙三十二年癸酉冬十月以

聖廟告成

詔遣

皇子胤祉至闕里告祭

衍聖公

臣

孔毓圻

奏為

廟工既經告竣

遣祭應籲

特恩謹據例陳請仰祈

睿鑒事

臣

查舊例明季弘治十七年修建闕里

聖廟落成時遣閣臣李東陽前詣祭告歷今三百年
來今蒙我

皇上鑒廟貌隳敝

特發內帑遣官監督修理於康熙三十一年八月內完

工經

臣

題報在案

臣

思前代修建率多因仍舊制塗茨丹雘

而已未有鼎新輪奐崇闋美備如今日者也其
經費出於地方取於稅課而已未有朱提十萬

特發帑金如今日者也其鳩工董成責於有司辨於守
土而已未有煌煌

聖諭特遣需官如今日者也其開工修理或時作而時
止或經年而累月未有不役一人不擾一物而
成工迅速如今日者也然於其落成猶遣大臣
以展祭祀告成功况我

皇上之曠典隆恩有踰前代而

廟庭之輝煌壯麗度越曩時典既尊崇禮宜隆重天

下之所欽仰四方之所觀瞻以及臣族衆人無
不引領翹首恭候

遣祭落成以爲

聖代之盛典以垂萬世之弘規特敢循例

題請應否照例

遣祭出自

皇上特恩事闕鉅典不獨微臣之私望而已且臣自

聖廟新成之後未奉

恩綸卽春秋丁祭未敢入廟供事暫在洙泗書院內致
祭擬合一併

題明仰祈

皇上睿鑒施行謹

題請

旨康熙三十二年三月二十八日題四月初七日奉

旨該部議奏

禮部

題前事該_臣等議得衍聖公孔毓圻疏稱

皇上鑒闕里廟貌墮敝

特發帑遣官監督修理

皇上之曠典隆恩有踰前代而

廟庭之輝煌壯麗度越曩時典既尊崇禮宜隆重特

敢

題請照例遣祭等語查明季實錄弘治十七年

聖廟落成遣閣臣李東陽前往致祭我

皇上之稽古右文崇儒重道

治統立帝王之極

心傳接洙泗之宗

聖域鳩工特重耑員之選良材庀具爰

頒內府之金

廟貌改觀几筵增麗規制倍隆於往昔模楷永著於

來茲今當落成之時應

遣大臣告祭恭候

命下之日其應行典禮再行具

題可也康熙三十二年四月二十三日題本月二十

五日奉

旨依議

禮部

題前事該

臣

等議得據欽天監回稱本年六月初七

日巳卯用卯時致祭

聖廟等因前來查定例內開

文廟春秋二祭開列滿漢大學士具題

欽點一員致祭

傳心殿開列滿漢大學士部院尚書等

欽點一員致祭等語又查致祭

先師孔子闕里應

遣大臣開列職名恭候

欽點差往致祭其祭文由翰林院撰擬木匣罩袱等物

由工部預備降真等香由戶部預備祭帛由太

常寺預備看守祭文香帛派筆帖式一員祭品
行文地方官照例備辦等語該_臣等議得應照
欽天監選擇日期致祭其祭文翰林院撰擬香
帛等項於該部寺衙門移取看守祭文香帛派
_臣部筆帖式一員前往祭品行文該地方官照
例備辦應

遣大臣開列職名具題恭候

欽點一員祭文香帛由

_臣

部交付起行先期齋戒三日

金史紀事本末卷之六
卷十六
朝服虔誠致祭可也康熙三十二年五月初四
日題九月二十九日奉

旨闕里

聖廟修建鼎新遣皇子前往告祭著再議具奏

禮部

題前事該_臣等再議得闕里

聖廟落成

皇上崇儒重道

特遣

皇子前往告祭今據欽天監回稱擇得本年十月十五
日乙酉宜用卯時

皇子起行十一月初六日乙巳宜用辰時告祭等語
應照欽天監選擇本月十五日卯時起行先期
齋戒二日於十一月初六日辰時致祭此致祭
時隨去大臣侍衛官員地方官員及衍聖公併
五氏官員俱隨行禮其引禮帛酒等事俱派太

常寺官員其餘俱照前議可也康熙三十二年
十月初四日題本月初六日奉

旨遣脣祉告祭餘依議

太常寺謹

題為

皇三子祭闕里

孔聖廟儀注祭日辰時

皇子穿便服補掛至大門外下馬處贊引官引

皇子從東邊門入至盥洗處贊引官唱盥手盥手畢
贊引官引至臺階上行禮處站立典儀官唱樂
舞生就位執事官各司其事唱畢贊引官贊就
位

皇子就位站立典儀官唱迎神唱樂官唱迎神樂奏
咸平之曲唱畢奏樂樂畢贊引官贊跪叩興

皇子行三跪九叩禮興典儀官唱奠帛爵行初獻禮
捧香帛爵官捧舉香帛爵就前向神位站立唱

樂官唱初獻樂奏寧平之曲唱畢奏樂贊引官
贊陞壇引

皇子從東邊門入就香案前司香官在案左邊跪贊
引官贊跪

皇子跪贊上香

皇子將香盒拱舉仍授與司香官

皇子站立將柱香拱舉插爐內又三次進塊香上畢

捧帛官跪贊引官贊跪

皇子跪行一叩頭禮興贊引官贊奠帛

皇子站立接帛拱舉獻于案上畢贊引官引

皇子至爵案前捧爵官跪贊引官贊獻爵

皇子站立接爵拱舉獻於中間跪行一叩頭禮興贊

引官贊詣讀祝位引

皇子詣讀祝位站立讀祝官至安祝文案前行一跪

三叩禮將祝文捧舉就前站立樂止贊引官贊

跪

皇子跪讀祝官亦跪贊引官贊讀祝讀祝官讀祝畢
將祝文捧舉至帛案前跪安於盛帛盒內畢行
三叩禮退奏樂贊引官贊

皇子行三叩禮畢興贊引官贊復位引

皇子復位站立樂畢典儀官唱行亞獻禮捧爵官將
爵捧舉就前向神位站立唱樂官唱亞獻樂奏
安平之曲唱畢奏樂贊引官贊陞壇引

皇子從東邊門入就爵案前捧爵官跪贊引官贊跪

皇子跪行一叩禮興贊引官贊獻爵

皇子站立執爵拱舉獻于左邊跪行一叩禮興贊引

官贊復位引

皇子復位站立樂畢典儀官唱行終獻禮捧爵官將

爵捧舉過神位前在右邊向神位站立唱樂官

唱終獻樂奏景平之曲唱畢奏樂贊引官贊陞

壇引

皇子從東邊門入過神位至右邊爵案就前捧爵官

跪贊引官贊跪

皇子跪行一叩禮興贊引官贊獻爵

皇子站立接爵拱舉獻于右邊畢跪行一叩禮興贊

引官贊復位引

皇子復位站立樂畢典儀官唱徹饌樂奏咸平之曲

唱畢奏樂樂畢典儀官唱送神唱樂官唱送神

樂奏咸平之曲唱畢奏樂贊引官贊跪叩興

皇子行三跪九叩禮興樂畢典儀官唱捧祝帛饌恭

詣燎位唱畢捧祝帛香饌官就前捧祝帛官跪
行三叩禮捧香饌官不叩俱跪請接次捧舉出

中門詣燎位

皇子至西邊站立俟祝帛饌過畢

皇子照舊就位站立焚祝帛贊引官贊禮畢

皇子退為此謹

題于康熙三十二年十月初九日題奉

旨著穿蟒袍皇子並不曾祭過在伊府內演禮隨去官

員亦令皇子認識皇四子皇八子在承祭皇三子後
陪祀行禮

附錄 明弘治十七年禮部尚書張昇等題覆
山東巡撫都御史徐源題為恤災異以崇正道
事一疏本部已經會議題准通行修蓋去後今
該前因案呈到部看得命官祭告陞擢官員係
隸吏禮二部掌行合行移咨貴部煩照各官題
奉欽依內事理徑自查照覆奏施行等因移咨

送司案呈到部切照巡撫都御史徐源巡按御史陳璘等題稱孔廟落成乞要御製宸章勒之堅珉及命館閣儒臣捧勅祭告一節臣等看得闕里孔廟自古尊崇歷代修建其創造廟宇嚴設聖像不知幾千百年矣皇上崇重聖道即命修蓋大出帑藏之資積至四年之久然後厥工告成雖仍舊址實乃重建輪奐鼎新壯麗堅緻倍蓰往昔非常修蓋之可倫也仰惟我朝每

歲春秋二丁於在京孔廟猶傳制特遣內閣大臣祭祀況東魯闕里寰宇欽仰茲孔廟新成又天下觀望所繫曠數百年希有之事理當異其禮儀極其崇重以爲一代之盛典垂萬世之成規今都御史徐源等所言誠知所重合無允其所請比照在京孔廟時祭事例仍請勅一道命文職大臣一員前往祭告行移翰林院撰御製碑文并祝文太常寺闕領香帛仍行本布政司

轉屬支給官錢買辦祭物至期致祭兵部應付船隻
并扛擡人夫等項所據遣大臣捧勅祭告伏乞聖裁
奉旨是遣大學士李東陽祭告著欽天監擇日來看
十月十五日乙酉

皇子在京起行

禮部咨為照

皇子於本月十五日起行告祭闕里

孔廟所有祭文在

皇子前行其經過地方官員照例迎送祭文之處相應知會山東巡撫作速遞傳轉行祭文所經過地方官員一體遵照可也

禮部咨該本部查得康熙二十三年

皇上親祭

聖廟穿補掛常服致祭在案今

遣皇子前往致祭或穿朝服或穿補服恭候

命下交與總管內務府預備可也康熙三十二年十月

初七日題本日奉

旨著穿補服欽此欽遵到部其隨去侍衛大臣官員及
地方官并衍聖公五氏官員俱穿補服可也

十八日戊子兵部傳

皇子諭曰我

皇父尊崇

先師重新

聖廟今告成

特遣予等前往恭祭凡一切應用物件俱係

皇父崇差官員動支帑銀採買一槩不須動用地方沿途地方各官或有不知妄稱預備苛派小民或有扈從官員指稱我等索求地方官員俱未可定爾等曉諭經過地方官員一切應用物件禁止不須預備倘有扈從人等指稱我等索取地方官員者許地方官即行拿送如地方官不行拿送或被傍人首告或被我等訪出即將地方

官一併指名奏

聞至扈從大臣侍衛以下護軍當差人等以上所需草料等物俱著用本身銀兩照依時價採買已經申飭又恐不肖之徒違禁强行勒買端派官兵嚴行查拏務使閭閻不擾仰副我

皇父加惠元元之至意著通行曉諭沿途村莊人民知悉可也

幸魯盛典卷十六